

Inzko se sastao sa nizozemskim ministrom vanjskih poslova, predsjednikom i glavnim tužiocem Haškog tribunala

Visoki predstavnik Valentin Inzko sastao se danas sa ministrom vanjskih poslova Nizozemske Urijem Rosenthalom. Tokom sastanka visoki predstavnik je istaknuo da put poslijeratnog oporavka Bosne i Hercegovine može biti deblokiran ako međunarodna zajednica nastavi podržavati pozitivne političke inicijative i sprečavati pokušaje osporavanja poslijeratnog sporazuma i ugrožavanja države.

Visoki predstavnik je zahvalio ministru vanjskih poslova Rosenthalu na ogromnoj podršci koju je Nizozemska pružila Bosni i Hercegovini. On je naglasio da države koje aktivno pomažu BiH u prevazilaženju aktuelnih problema trebaju znati da je njihova uloga neprocjenjiva, te da su izgledi za uspjeh i dalje visoki.

Ranije u toku dana visoki predstavnik se sastao sa predsjednikom Međunarodnog krivičnog tribunala za bivšu Jugoslaviju, Theodorom Meronom, i glavnim tužiocem Haškog tribunala Sergeom Brammertzom.

Pored razgovora o radu Haškog tribunala i saradnji BiH sa Tribunalom, visoki predstavnik je sa sagovornicima također razgovarao o nedavnim pokušajima osporavanja postojanja i nadležnosti Suda i Tužilaštva BiH, koji se dešavaju unutar BiH.

“Svaka inicijativa koja za cilj ima ukidanje državnog sudstva

ili smanjivanje njegovih nadležnosti predstavlja direktan izazov sposobnosti države da provodi svoje ustavne odgovornosti," izjavio je Inzko. Sud i Tužilaštvo BiH su ključne državne institucije za osiguravanje vladavine prava u BiH.

Visoki predstavnik podsjetio je danas da su ustavnost Zakona o Sudu BiH te nadležnost ovog suda već osporavani pred Ustavnim sudom BiH, 2001. godine te ponovo 2008. godine. U oba navrata, Ustavni sud BiH je potvrdio da Bosna i Hercegovina putem Suda BiH ima obavezu da provodi svoje ustavne odgovornosti. Uspostavljanje ovih institucija također je bilo ključni element strategije za zatvaranje Međunarodnog krivičnog tribunala u Hagu.